

Na osnovu člana 72. Zakona o izvršenju Budžeta Tuzlanskog kantona za 2024. godinu ("Službene novine Tuzlanskog kantona broj: 3/24) i člana 23. stav 1. alineja 5. Zakona o ministarstvima i drugim organima uprave Tuzlanskog kantona ("Službene novine Tuzlanskog kantona" broj: 17/00, 3/01, 12/03, 10/05, 3/08, 8/11 i 15/13), ministar finansija donosi

UPUTSTVO
O POSTUPKU REFUNDACIJE UPLAĆENIH SUDSKIH I ADMINISTRATIVNIH TAKSI
ZA UPIS U NADLEŽNI REGISTAR I TROŠKOVA NA IME NABAVKE FISKALNOG
UREĐAJA

I. OPĆE ODREDBE

Član 1.

Ovim Uputstvom propisuje se postupak refundacije uplaćenih sudskih taksi za upis poslovnih subjekata u Registarom odjeljenju Općinskog suda u Tuzli i administrativnih taksi za upis osnovnog, dodatnog i dopunskog zanimanja u nadležni gradski ili općinski obrtni registar, upisnik putničkih agencija, upisnik turističkih vodiča, upisnik odobrenja za pružanje ostalih turističkih usluga fizičkih osoba, registar trgovačkih radnji, registar ugostiteljskih radnji, te registar izdatih odobrenja za obavljanje privatne prakse zdravstvenih radnika i zdravstvenih saradnika kod Ministarstva zdravstva Tuzlanskog kantona u 2024. godini.

Ovim Uputstvom propisuje se i postupak refundacije troškova na ime nabavke fiskalnog uređaja u cilju fiskalizacije u 2024. godini za poslovne subjekte iz stava 1. ovog člana.

Član 2.

Pod sudskim taksama u smislu ovog Uputstva podrazumijevaju se sudske takse utvrđene Zakonom o sudskim taksama - prečišćen tekst ("Službene novine Tuzlanskog kantona", br. 4/16 i 10/18) - Tarifa sudskih taksi - vrsta prihoda-722221, i to:

1. Tarifni broj 19. (takse za podneske)

a) Za prijavu u sudski registar

2. Tarifni broj 20. (taksa za upise u sudski registar)

a) Za rješenje o upisu osnivanja privrednog društva,

b) Za rješenje o upisu osnivanja dijelova privrednog društva,

c) Za rješenje o upisu osnivanja drugih pravnih osoba koje nisu navedene pod točkama a) i b),

d) Za rješenje o upisu osobe ovlaštene za zastupanje pravne osobe,

e) Za rješenje o upisu prava vršenja spoljnotrgovinskog prometa,

f) Za rješenje o upisima koji nisu obuhvaćeni prethodnim točkama.

Pod sudskim taksama u smislu ovog Uputstva podrazumijevaju se i uplate izvršene u svrhu objavljivanja oglasa u "Službenim novinama Federacije Bosne i Hercegovine" za potrebe upisa osnivanja privrednog društva i/ili upisa prava obavljanja vanjskotrgovinskog poslovanja.

Član 3.

Pod administrativnim taksama u smislu ovog Uputstva podrazumijevaju se administrativne takse na ime izdavanja rješenja o odobrenju za rad utvrđene Zakonom o kantonalnim administrativnim taksama - prečišćen tekst ("Službene novine Tuzlanskog kantona", br. 6/12, 15/13 i 10/18) - Tarifa kantonalnih administrativnih taksi -kantonalne administrativne takes - vrsta prihoda-722121 i općinske administrativne takse u skladu sa

propisima jedinica lokalne samouprave uplaćene na ime izdavanja odobrenja za rad - vrsta prihoda – 722131, 722135 i 722449.

Član 4.

Pravo na refundaciju uplaćenih sudskih i administrativnih taksi iz člana 1. ovog Uputstva iz sredstava Budžeta Tuzlanskog kantona imaju uplatitelji istih pod uslovom da jedinice lokalne samouprave na području Tuzlanskog kantona u čiji nadležni općinski ili gradski obrtni registar, upisnik putničkih agencija, upisnik turističkih vodiča, upisnik odobrenja za pružanje ostalih turističkih usluga fizičkih osoba, registar trgovačkih radnji, registar ugostiteljskih radnji se vrši upis, ne vrše refundaciju uplaćenih taksi ili ne provode postupak oslobođenja istih.

II. UTVRĐIVANJE PRAVA NA REFUNDACIJU SUDSKIH TAKSI, KANTONALNIH ADMINISTRATIVNIH TAKSI I OPĆINSKIH ADMINISTRATIVNIH TAKSI

Član 5.

Pod uplaćenim sudskim i administrativnim taksama, u smislu ovog Uputstva, podrazumijeva se uplata koja je evidentirana na Jedinostvenom računu trezora Tuzlanskog kantona (JRT) ili računu jedinice lokalne samouprave Tuzlanskog kantona u ovisnosti od pripadnosti takse, na način propisan važećim Pravilnikom o načinu uplate, pripadnosti i raspodjele javnih prihoda u Federaciji Bosne i Hercegovine i drugim važećim zakonskim propisima i aktima kojima se regulira način uplate sudskih i administrativnih taksi.

Pod uplatiteljem, u smislu ovog Uputstva, podrazumijeva se pravno ili fizičko lice koje je izvršilo uplatu sudske ili administrativne takse na JRT ili račun jedinice lokalne samouprave ili pravno lice koje je izvršilo uplatu na ime nabavke fiskalnog uređaja.

Član 6.

Pod fiskalnim uređajem se podrazumijeva fiskalna kasa/štampanč ili drugi uređaj za registrovanje prometa dobara i usluga unesenih u njenu bazu podataka o dobrima i uslugama koji se na propisani način saopštavaju kupcu dobara, odnosno korisniku usluga (klijentu) uz istovremeno evidentiranje na kontrolnoj traci ili drugom mediju fiskalne kase ili drugom fiskalnom uređaju, njihovo periodično evidentiranje u fiskalnoj memoriji fiskalne kase/štampanča ili drugog fiskalnog uređaja kao i formiranje odštampanih fiskalnih dokumenata.

Član 7.

Pravo na refundaciju uplaćenih novčanih sredstava na ime nabavke fiskalnog uređaja imaju obveznici fiskalizacije koji u toku 2024. godine kumulativno ispune sljedeće uslove:

1. osnuju privredni subjekt prvi put i
2. prvi puta provode postupak fiskalizacije za privredni subjekat iz tačke 1.

Refundacija novčanih sredstava na ime nabavke fiskalnog uređaja vrši se jednokratno.

Pod uplaćenim novčanim sredstvima na ime nabavke fiskalnog uređaja podrazumijevaju se uplate izvršene isključivo bezgotovinskim načinom plaćanja od strane poslovnog subjekta koji je osnovan u toku 2024. godine ovlaštenom proizvođaču/zastupniku ili ovlaštenom distributeru na ime nabavke fiskalnog uređaja, a u skladu sa Zakonom o fiskalnim sistemima ("Službene novine F BiH" broj: 81/09).

Pod uplaćenim novčanim sredstvima na ime nabavke fiskalnog uređaja ne podrazumijevaju se uplate izvršene gotovinskim plaćanjem i iste ne podliježu odobravanju prava na refundaciju novčanih sredstava na ime nabavke fiskalnog uređaja.

Član 8.

Poslovni subjekti iz člana 1. ovog Uputstva mogu ostvariti pravo na refundaciju novčanih sredstava na ime nabavke fiskalnog uređaja u maksimalnom iznosu do 800,00 KM sa uključenim PDV-om.

Član 9.

Pravo na refundaciju uplaćenih sudskih taksi za upis poslovnih subjekata u Registarskom odjeljenju Općinskog suda u Tuzli i administrativnih taksi za upis u nadležni registar iz člana 1. stav 1. ovog Uputstva kao i novčanih sredstava na ime nabavke fiskalnog uređaja može biti odobreno istom osnivaču više poslovnih subjekata ili vlasnika obrta samo za 1 (jedan) novoosnovan poslovni subjekt ili obrt u toku tekuće fiskalne godine.

Član 10.

Postupak refundacije uplaćene sudske ili administrativne takse ili uplate na ime nabavke fiskalnog uređaja pokreće se na temelju pisanog zahtjeva uplatitelja.

Član 11.

Zahtjev za refundaciju iz člana 7. ovog Uputstva podnosi se Ministarstvu finansija Tuzlanskog kantona (u daljem tekstu: Ministarstvo).

Član 12.

Uz zahtjev iz člana 7. ovog Uputstva, koji obvezno sadrži osnovne podatke uplatitelja (prezime, ime, adresa, JMBG i kontakt telefon za fizička lica, odnosno naziv i sjedište firme, ID broj i kontakt telefon za pravna lica), za refundaciju uplaćenih kantonalnih sudskih taksi i općinskih administrativnih taksi prilaže se:

- dokaz o upisu poslovnog subjekta u Registarskom odjeljenju Općinskog suda u Tuzli ili upisu u nadležni registar iz člana 1. stav 1. ovog Uputstva u 2024. godini – original ili ovjerena kopija
- Uvjerenje o poreskoj registraciji – original ili ovjerena kopija
- dokaz o izvršenoj uplati sa jasno naznačenom svrhom uplate i vrstom prihoda i šifre općine (nalog za uplatu ili ovjerena kopija naloga za uplatu, dnevni izvod sa žiro računa uplatioca i drugi dokazi na temelju kojih se mogu utvrditi podaci i svrha uplate) – original ili ovjerena kopija
- ovjerena izjava uplatioca kantonalnih sudskih taksi ili općinskih administrativnih taksi iz člana 2. i 3. ovog Uputstva da nije ostvario pravo na oslobođenje od plaćanja sudskih ili administrativnih taksi ili refundaciju uplaćenih taksi od strane jedinica lokalne samouprave na području Tuzlanskog kantona u toku tekuće fiskalne godine
- fotokopija važeće lične karte i
- fotokopija broja računa odnosno bankovne kartice za fizička lica ili broj žiro računa za pravna lica
- eventualno ostali dokazi o izvršenim uplatama.

Uz zahtjev iz člana 7. ovog Uputstva za refundaciju novčanih sredstava na ime nabavke fiskalnog uređaja prilaže se:

- dokaz o upisu poslovnog subjekta u Registarском odjeljenju Općinskog suda u Tuzli ili upisu u nadležni registar iz člana 1. stav 1. ovog Uputstva u 2024. godini – original ili ovjerena kopija
- Uvjerenje o poreskoj registraciji – original ili ovjerena kopija
- Rješenje o fiskalizaciji fiskalnog sistema u 2024. godini – original ili ovjerena kopija
- dokaz o izvršenoj uplati novčanih sredstava na ime nabavke fiskalnog uređaja i to kumulativno sljedeći dokazi: fiskalni račun, faktura, izvod sa žiro računa na ime nabavke fiskalnog uređaja – original ili ovjerena kopija
- fotokopija broja žiro računa za pravna lica
- ovjerena izjava osnivača novoosnovanog privrednog subjekta odnosno vlasnika obrta da prvi puta podnosi zahtjev za refundaciju novčanih sredstava odnosno da nije ostvario pravo na refundaciju novčanih sredstava iz člana 1. ovog Uputstva u toku tekuće fiskalne godine
- eventualno ostali dokazi o izvršenim uplatama.

III. ODOBRAVANJE REFUNDACIJE SUDSKIH TAKSI, KANTONALNIH ADMINISTRATIVNIH TAKSI I OPĆINSKIH ADMINISTRATIVNIH TAKSI

Član 13.

Ministarstvo, na temelju analitičke evidencije i dokumentacije sa kojom raspolaže i dokumentacije priložene uz zahtjev uplatitelja, u skladu sa odredbama Zakona o upravnom postupku i drugim zakonima i propisima kojima je regulisan taj prihod, donosi rješenje o utvrđivanju prava na refundaciju uplaćene sudske takse, kantonalne administrativne takse, općinske administrativne takse ili uplaćenih novčanih sredstava na ime nabavke fiskalnog uređaja.

Kada to ocijeni potrebnim, Ministarstvo može od podnosioca zahtjeva koji je dostavio svu traženu dokumentaciju ili nadležnog organa zatražiti da dostavi dodatne dokaze ili drugu dokumentaciju potrebnu za rješavanje podnesenog zahtjeva.

Pravo na podnošenje zahtjeva za refundaciju uplaćene sudske takse, kantonalne administrativne takse ili općinske administrativne takse ili troškova na ime nabavke fiskalnog uređaja uplaćenih u 2024. godini ističe 31.12.2024. godine.

Dispozitiv rješenja iz stava 1. ovog člana obvezno sadrži:

- prezime i ime i adresu za fizička lica, odnosno naziv i sjedište pravnog lica - uplatitelja sredstava
- visinu uplaćene sudske takse, kantonalne administrativne takse ili općinske administrativne takse ili visinu izvršene uplate na ime nabavke fiskalnog uređaja;
- šifru prihoda i općine;
- datum uplate;
- identifikacijski broj podnosioca zahtjeva za pravna lica ili jedinstveni matični broj građanina;
- broj žiro-računa i naziv banke kod koje je otvoren za uplatitelja sredstava – fizičkog ili pravnog lica.

Član 14.

Refundacija uplaćene sudske takse, kantonalne administrativne takse ili općinske administrativne takse ili uplaćenih novčanih sredstava na ime nabavke fiskalnog uređaja izvršava se potpunom naloga za prenos sredstava, potpisanim od strane ovlaštenih lica, a na račun pravnog ili fizičkog lica.

Nalog za prenos popunjava se na način propisan važećim Pravilnikom o načinu uplate javnih prihoda budžeta i vanbudžetskih fondova na teritoriji Federacije Bosne i Hercegovine.

Nalozi za refundaciju mogu se ispostavljati djelimično u skladu sa tekućim prilivom na JRT.

IV. PRIJELAZNE I ZAVRŠNE ODREDBE

Član 15.

Izuzetno od odredbi člana 13. stav 3. ovog Uputstva, za poslovne subjekte iz člana 1. ovog Uputstva koji izvrše upis u Registarskom odjeljenju Općinskog suda u Tuzli ili u nadležni registar u periodu od 15.12.2024.-31.12.2024. godine pravo na podnošenje zahtjeva za refundaciju uplaćenih sudskih i administrativnih taksi kao i novčanih sredstava na ime nabavke fiskalnog uređaja ističe 31.01.2025. godine.

Refundacija novčanih sredstava iz stava 1. ovog člana će biti izvršena na teret budžeta Tuzlanskog kantona za 2025. godinu.

Član 16.

Na sva pitanja koja nisu uređena ovim Uputstvom primjenjivat će se odredbe Zakona o upravnom postupku ("Službene novine Federacije Bosne i Hercegovine", broj: 2/98, 48/98 i 61/22).

Član 17.

Ovo Uputstvo stupa na snagu danom donošenja, primjenjuje se za 2024. godinu i objavit će se u "Službenim novinama Tuzlanskog kantona".

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
MINISTARSTVO FINANSIJA

Broj: 07/1-11- 9314/24
Tuzla, 05.04.2024. godine

